



HASATIL

HAMETIN AGRIKULTURA SUSTENTABEL TIMOR LOROSA'E

Rua. St.Antonio Motael – Farol, Dili

Telf. (+670) 77287429 E-Mail : hasatil@sapo.tl

Submisaun Ba Komisaun C Parlamentu Nasional

Husi

Rede HASATIL

Dili 29 Novembru 2018

INTRODUSAUN

Ba dala uluk Rede HASATIL hato'o ami nia Agradesimentu ba konvite husi Komisaun C Parlamentu Nasional ne'ebé fó mós oportunidade mai ami atu fahe HASATIL nia informasaun no análise sira kona ba dezenvolvimentu setór agrikultura iha Timor-Leste liga ho Proposta Orsamentu Jerál do Estadu tinan 2019.

Konteúdu husi submisaun ne'e, ami identifika pontu importante sira mak ami hanoin importante tebes atu ita boot sira konsidera no tenke diskute ho kuidadu no kle'an atu nune'e bainhira Orsamentu Jerál do Estadu 2019 hetan aprovasaun bele korresponde duni ba interesse no nesesidade agrikultór sira iha Timor-Leste.

HASATIL (Hametin Agrikultura Sustentável Timor Lorosa'e) nudár rede ne'ebé harii, hodi promove "agrikultura sustentável" ho filozofia servisu ba konserva rai, be, fini no matenek lokál iha Timor-Leste. Dezde HASATIL estabelese to'o ohin loron, hamahan ona Organizasaun Sosiedade Sivíl hamutuk tolu nulu resin hitu (37) ne'ebé eziste iha munisipiu

sanulu resin tolu (13) no implementa sira nia programa tuir vizaun no misaun rede HASATIL nian.

Atu haforsa papél no servisu rede nian, ami nia prioridade importante sira mak iha area intervensaun boot haat (4) mak sai nudár alvu orientasaun rede nian ba dezenvolvimentu setór agrikultura iha rai laran. Area hirak ne'e mak hanesan: Edukasaun no Peskiza, Advokasia, Mobilizasaun membru no mós Produsaun no Merkadorias. Aleinde ne'e, servisu advokasia rede nian mós sai parte ba servisu kampaña movimentu sira iha nível nasional hamutuk rede sektorál no nudár membru KONSSANTIL, nível regional no mós movimentu internasional ne'ebé luta ba soberania ai-han (REDSAN-CPLP, La Via Campesina, Sea Rice Filipina, Mitra Tani Sejati no Serikat Petani Indonesia).

Hanesan rede ne'ebé tau matan iha setór Agrikultura sustentável iha Timor-Leste, ami iha kometimentu boot atu servisu no sai nudár parseiru di'ak ho governu, Parlamentu Nasional, parseiru dezenvolvimentu sira no kolabora ho entidade relevante hotu hodi kontribui ba prosesu dezenvolvimentu iha setór agrikultura.


GOVERNU TIMOR-LESTE TENKE TAU PRIORIDADE IHA SETÓR AGRIKULTURA

Ami hanoin katak setór agrikultura mak prioridade tebes no tenke hetan atensaun no mós investimentu boot husi governu Timor-Leste tanba realidade hatudu katak maioria populauna iha Timor-Leste 75% hela iha area rural no sira hala'o vida moris nudár agrikultura sub-sistensia¹. Maske iha dezafiu oin-oin ne'ebé sira enfrenta maibé agrikultór sira nafatin kontinua halo produsaun ba sustenta sira nia moris hodi responde ba sira nia nesesidade báziku sira.

Governu tenke prioritiza setór agrikultura iha Timor-Leste tanba setór ida ne'e bele oferese kampu servisu ba ema barak no mós bele kontribui tebes ba hamenus número populauna nabee enfrenta mal nutrisaun iha Timor-Leste, aléinde ne'e sei hadi'ak ekonomia uma kain ninian iha nível baze. Bainhira setór agrikultura dezenvolve ho di'ak mak ita sei kore an husi dependénsia ba importasaun ai-han ne'ebé mai husi rai li'ur.

Iha relatório KONSSANTIL hatudu katak ita nia número produsaun kada tinan kontinua tun ba bei-beik tanba maioria ita nia rai produtivu barak abandona no ladún hetan atensaun di'ak husi governu, parte seluk ita nia rai produtivu barak moos ninia funsaun nakfilak no utiliza ba dezenvolve projetu infrastrutura fíziku sira, indústria Tasi Mane iha parte Kosta súl no projetu boot seluk.

¹ Rezultadu Sensu Populauna no Uma Kain, 2015



Gráfiku hatudu katak produsaun husi dezde tinan 2007 too tinan 2018² menus no tun ba bei-beik. Infelizmente política fiskál governu nian ba setór agrikultura dezde tinan sanulu resin liu ba kotuk to'o ohin loron. Dezenvolvimentu setór agrikultura kontinua la hatudu mudansa ida ne'ebé signifikante hodi investe ba agrikultura no setór produtivu seluk. Tuir ami nia análise, maioria alokasaun orsamentu estadu nian kada tinan sempre fó prioridade boot liu ba setór infrastrutura hanesan Projetu Tasi Mane, ZEESM, Portu no Aeroportu sira duke setór produtivu no servisu báziku sira ne'ebé povu barak depende ba.

KONKLUZAUN NO REKOMENDASAUN

Atu remata, ami husi rede HASATIL, husu ba Distintu Deputadu/a sira iha uma fukun Parlamentu Nasional partikulármente ba Komisaun C atu utiliza duni ita boot sira nia diskusaun durante debate Proposta Orsamentu Jerál Estadu 2019, hodi husu ba Governu liu-liu Ministériu Agrikultura no Peskas atu prioritiza no halo investimentu boot liu tan ba infrastrutura báziku sira hanesan: irrigasaun, sentru prosesamentu produsaun, laboratóriu Nasional hodi bele halo teste ba produtu importasaun sira, Alende ne'e hasa'e koñesimentu toos na'in sira nian atu haforsa produtividade ba halo produsaun no mós haforsa partisipasaun foin sa'e sira nian iha vida agrikultór

Obrigadu wain

Gil Boavida
Koordenadór Sekretaridu HASATIL

Grupo Trabalho Advokasia Rede HASATIL
La'o Hamutuk, Asosiasaun HAK, KSI, Permatil, Fundasaun Haburas, RAIBEA,
FOKUPERS, OHM, HADER, IMI, MAHARU

² Dadus husi Relatório Trimestral KONSSATIL-MAP, 2018.